



Sesida dals

14 d'avrigl 2020

Communitgà ils

16 d'avrigl 2020

Protocol nr.

294

Dumonda Rettich

concernent il svilup e l'integraziun da la lavur sociala da scola en il chantun Grischun

Resposta da la Regenza

Dapi var 15 onns datti lavur sociala da scola (LSS) en il chantun Grischun. Las instituziuns responsablas per la scola han decidì fin ussa independentamain, sch'ellas vulan introducì LSS u betg. Quest svilup, q.v.d. l'extensiun adattada e la decisiun da las instituziuns responsablas per la scola pertutgadas, correspunda en general a la situaziun da l'entira Svizra. LSS n'è betg derasada sin l'entir chantun, vegn però applicada là, nua ch'i fa da basegn resp. nua ch'i para urgent da porscher in sustegn per problems socials en il context da scola. Qua presta LSS in agid prezios.

Organisatoricamain è LSS per regla attribuida a l'instituziun responsabla per la scola ubain a la vischnanca politica (p.ex. al Servetsch social).

Tar la dumonda 1: LSS è s'establida en bleras instituziuns responsablas per la scola dal chantun, particularmain là, nua ch'i èn avant maun problems socials. Actualmain datti LSS en var 20 pertschient da las instituziuns responsablas per la scola dal Grischun. En ulteriuras instituziuns responsablas per la scola prevesan u spetgan ins d'introducì concretamain LSS. Per part vegn LSS ultra da quai cumprada per singuls projects u per singulas incumbensas, senza vegnir installada fixamain.

En differentas scolas survegnan scolaras e scolaras (SeS) in sustegn cumpetent da la purschida da LSS, che als gida a dumagnar problems socials. Per exempel poi sa tractar da projects da classa en connex cun las medias socialas u da cussegliaziuns individualas en connex cun dumondas da dependenza. Cur ch'ina purschida vegn introducida, vegn ella mintgamai adattada a las relaziuns regionalas. Ord vista da la

Regenza è quai sa cumprovà ed ha chaschunà ina buna acceptanza resp. francaziun da LSS en questas instituziuns responsablas per la scola.

Tar la dumonda 2: Ord vista da la Regenza n'èsi betg cunvegnent d'integrar LSS en il chantun resp. en l'Uffizi per la scola populara ed il sport. La regulaziun vertenta è sa cumprovada, sco explitgà sut la dumonda 1. LSS è ina purschida per SeS dal sector simpel. Tenor la Lescha davart las scolas popularas dal chantun Grischun (Lescha da scola; DG 421.000) èsi chausa da las instituziuns responsablas per la scola da concepir il sector simpel.

Tar la dumonda 3: AvenirSocial (Federaziun professiunala da lavur sociala en Svizra) e la Federaziun da lavur sociala da scola han relaschà directivas da qualidad per LSS. Ils purschiders da servetschs pon consultar questas directivas da qualidad. La controlla da la prestaziun è chausa da las autoritads d'engaschament resp. da las instituziuns responsablas per la scola.

Tar la dumonda 4: Il rom legal vertent en la Lescha da scola (art. 40) cun sia formulaziun facultativa è sa cumprovà ord vista da la Regenza. Quest rom permetta a las instituziuns responsablas per la scola da decider sezzas, sch'ellas vulan introducir ina LSS adattada a las relaziuns regionalas. L'extensiun da la basa legala n'è pia betg necessaria ord vista da la Regenza.



En num da la Regenza

Il president:

Dr. Chr. Rathgeb

Il chancelier:

Daniel Spadin